

DEN AMBIENTE

BANCHI KOOLMAN Y SU SALSA Y SABOR LO BAY CELEBRA NAN IO AÑA DI EXISTENCIA DEN FARANDULA..

****** Mayan diadomingo dia 3 di Maart e popular agrupacion musical "BANCHI KOOLMAN Y SU SALSA Y SABOR", lo bay celebra nan 10 aña den Farandula.

E ocasion tan especial aki lo bay tuma lugar den Yara Ranch na Savaneta, porcierto e cuna di e agrupacion tan popular di pueblo. E pachanga ta start sali 4or di atardi y lo bay termina te ora cu nan querido fanaticonan haya ta basta!

Hunto cu "Banchi Koolman y su Salsa y Sabor", tambe lo tye pa deleita un i tur e siguiente agrupacionnan musical; "The Latin Brothers", "The Swinging Boys", "Placentero Ritmo y Cuerde", "Vicente y Los Pimentosos" y naturalmente nan rumannan cu ta "The Original Band".

Pues durante e pachanga aki ta ritmo criollo lo bay sacudi e digno barrio di Savaneta, na unda tambe como muestra di aprecio y gratitud na tur nan fiel fanaticonan, "Banchi Koolman y su Salsa y Sabor" lo bay regala algun premionan sumamente atractivo como doorprize.

E INICIO DI SALSA Y

SABOR.

DEN AMBIENTE tabatin e grato placer y honor di por a combersa cu e fundador y manager di Salsa y Sabor, esta Banchi Koolman. Banchi a conta con el a bin na funda su agrupacion musical y su 10 añanan di existencia.

Na aña 1986 den luna di Maart, Banchi cu tabata forma parti di Estrella del Oro como manager, a dicidi di forma su Salsa y Sabor cu e meta primordial pa toca na fiestanan familiar y social.

Segun Banchi cu el a nota un bashi enorme pa tipo di fiestanan, ya cu bandanan popular tabata dificil y ademas nan suma tabata demasiado halto pa un famia humilde.

Pues mirando e oportunidad y necesidad aki, el a forma su agrupacion den un constelacion limita, pa asina e por a ofrece su servicio na un prijs familiar.

TUR SIMAN TIN TOCA.

E meta aki a resulta den un exito rotundo, ya cu practicamente tur siman nan ta ocupa cu sea fiestanan di bruid, ricibimiento, cumpleaños, social y etc.

Banchi ta sigui conta cu nan

agrupacion no ta pa genera placa, pero simplemente como un hobby di diverticion. Esaki ta un acuerdo cu tur su integrantenan a tuma na serio. Ta berdad si cu toca na fiestanan practicamente tur siman, ta un sacrificio, pero ya nan a custumbra cu esaki.

E SATISFECHO.

E satisfecho ta pa mira e publico riba pista di baile, gozando y disfrutando di nan fiesta social. Pa Banchi, mihor toca pa un suma abao na fiestanan social, cu toca pa sumanan astronomico na fiestanan di club, ya cu pa fiestanan social e ambiente tin e calor familiar y e harmonia ta mucho mas agradable.

Ademas tambe cu tocando pa fiestanan familiar, bo ta crea bo propio fanaticonan, cual ta sumamente importante, debi cu den transcurso di aña, bo ta bira e agrupacion musical queri di PUEBLO. Esaki ta duna cu unda cu bo bay toca, bo por conta riba bo fiel fanaticonan, Banchi den un forma sumamente satisfecho ta expresa na DEN AMBIENTE.

MUY PRONTO RIBA C.D.

Riba e pregunta di con 10



**** Foto ta ilustra e integrantenan di "BANCHI Y SU SALSA Y SABOR"...Renny Larmonie, Palili Carion, Banchi Koolman, Rosendo Kock, Pedro Flemming, Chomay Koolman y Frankie v/der Linden...**

aña den Farandula y ainda no a graba un produccion. E dinamico fundador y manager a declara cu un sonrisa, pa keda pendiente, ya cu nan a caba di realiza nan prome cancion cu lo bay aparece riba nan prome C.D.

E cancion aki a ser graba den Watapana Recording Studio. E cancion ta ritmo di salsa y ta contene e letranan na nos dushi idioma papiamento. Na ocasion di nan 10 aña di celebracion, nan a bautiza e cancion aki riba e number di nan propio agrupacion esta, "Salsa y Sabor".

Porcierto e pieza aki a cuminsa ta zona caba riba nos radio-emisoranan, pa cual nan ta sumamente satisfecho pa e reaccion positivo cu nan ta ricibi.

Banchi y su Salsa y Sabor ta consisti di e siguiente integrantenan; Chomay Koolman (acordeon), Palili Carion (sentyzeiser/cantante), Renny Larmonie (piano/quitar), Frankie v/der Linden (bajo/cantante), Pedro Flemming (bateria), Rosendo Kock (percusion) y "last but not least" Banchi Koolman (cantante/conga/manager).

Awenochi ta fiesta di "Sancochi"...

COLONIA DOMINICANO Y HENTER ARUBA LO "GOZAAA" CU LOS TOROS BAND...

****** Tur cos ta cla pa awenochi den Club Douane bay tuma lugar e grandioso celebracion di e colonia Dominicano residencia aki na Aruba, cu un "bombarazo bonche" fiesta bailable, na unda lo ta presente e indiscutible "LOS TOROS BAND" directamente for di Republica Dominicana.

Hunto cu "Los Toros Band" tambe lo resona nan tononan musical e agrupacion musical E.Q.O. di Aruba, kendenan lo baha mas "brabu" cu e toronan.

Segun DEN AMBIENTE por a compronde cu e popular torero "El Principe Blue Star", lo presenta cu un show especial hunto cu un banda estilo "Perico Ripiao". Pues e pista tambe lo ta "ripiario ripiao".

E toronan lo yega Aruba awe merdia pa 1or, na unda nan lo ser ricibi engrande pa e colonia Dominicano na aeropuerto.

Aki na Aruba ainda Los Toros Band no ta asina conoci, pero riba tereno internacional Los Toros Band actualmente ta gozando di un popularidad inmenso.

Los Toros Band un di bandanan musical mas exitoso na Republica Dominicana, ta ganadornan di varios premionan prestigioso manera: Premio "ACRORTE" como revelacion di aña 1991 na Santo

Domingo; New York City "Premios Estrellas del Merengue" como Orquesta Revelacion na aña 1991; Boston, Massachusett, "Premios Continente de Plata" como revelacion di aña 1991; New York City, "Premios Valores Humanos" como Orquesta di aña 1992; New York City "Premios Estrellas del Merengue" como Orquesta Sensacional di aña 1992; New York City "Premios Too Much" como Orquesta di aña 1992; Republica Dominicana, "Premios El Casandra" como Orquesta di aña 1992; Na aña 1994 Los Toros Band a ser nomina pa e premio ACE den categoria Orquesta Tropical.

E aña aki tambe nan ta spera di logra varios premionan di aña 1995, cual te ainda no a ser organiza tanto na Republica Dominicana como na Merca.

Pues si tuma na nota di e logronan di Los Toros Band, muy especialmente na New York, ta visto cu aki ta trata di un orquesta profesional di caliber halto cu sin duda merece un aceptacion total aki na Aruba.

Na ciere di e edishon aki, DEN AMBIENTE a ricibi e ultimo informacion cu e promotornan a dicidi di mantene e prijs di entrada na porta di Douane Club na 20 dollar, debi cu ayera e interes tabata hopi



grandi. Pero toch e promotornan kier a enfatiza, cu e ticketnan ta limita na entrada awenochi.

Awenochi manera un "Toro Brabu", DEN AMBIENTE conhuntamente cu e colonia Dominicana lo bay celebra y goza den Club Douane e fecha di "Dia de la Independencia de la Republica Dominicana", na unda nos lo bay torea un tiki riba e sobroso ritmo di merengue y naturalmente pa tene e "brake" di e toro lanta, e soppie di "SANCOCHO" lo no bay hasi faltaaaaa...